

四庫全書

史部

欽定四庫全書

欽定續通志卷五十二

金紀六

章宗一

章宗皇帝諱璟小字瑪達格顯宗嫡子也母曰孝懿皇后圖克坦氏初封金源郡王世宗令習本朝語言文字及漢字經書以進士完顏匡司經徐孝美等侍讀大定二十五年六月顯宗崩十二月進封原王判大興府事

入以國語謝世宗喜頷謂宰臣曰朕嘗命諸王習本朝語惟原王語甚習朕甚嘉之二十六年四月詔賜名璟尋拜尚書右丞相世宗謂曰宮中有輿地圖觀之可以具知天下遠近阮塞又謂宰臣曰朕所以置原王於近輔者欲令親見朝廷議論習知政事之體故也十一月詔立為皇太孫世宗諭之曰建立在朕保守在汝宜盡忠孝無失衆望二十八年十二月世宗不豫詔攝政二十九年正月癸巳世宗崩太孫即皇帝位於柩前

恭讀

御製全韻詩題金章宗云乃祖嘉習國語為孫宜守舊物服御漸染華風疎忌那聞吁咈付託却喜柔弱馴致金源道

詘惜哉大定規模直使章宗衰託按章宗即位以後一切政教未嘗不知治體雖典章文物稍有可觀而誅戮諸

王傳授非人至於祖宗詰戎肆武之舊棄之如遺遂使元兵啟釁莫之能支

聖製謂為孫宜守舊物大哉
王言誠萬世治道之本也謹錄識之
丙申詔免今歲租稅并

自來懸欠等錢山東統軍喬以私過都城不赴哭臨答

五十降授彰化軍節度使二月辛酉朔日有食之癸亥

追尊皇考為皇帝尊母為皇太后甲子命學士院進呈

漢唐便民事及當今急務敕開登聞鼓院以違冤枉已

已敕御史臺自今監察令本臺辟舉任內不稱職亦從

奏罷乙酉詔有司稽考典故許引用宋事是月宋主內

禪子惇嗣立三月壬辰朝皇太后於隆慶宮是月凡五

朝

按章宗朝隆慶宮及一切數行之典如禘饗謁陵與春水秋山諸國聘問之類俱於初見處書之後不復

叙

夏四月乙酉葬世宗皇帝於興陵五月丙午以祔廟

禮成大赦

按五簡錄載正月丙申大赦五月丙午又大赦蓋正月大赦因初即位也五月大赦以祔

廟禮成也金史於正月丙申不載大赦當係脫漏

庚戌詔罷送官錢今後諸護

衛考滿賜官錢二千貫壬子敕收錄功臣子孫量材於

局分承應閏月庚申朔封兄珣為豐王琮鄆王瓌瀛王
從彛沂王弟從憲壽王玠溫王丙寅觀稼於近郊庚午
以唐古貢為御史大夫壬申封乳母孫氏蕭國夫人姚
氏華國夫人丙子進封趙王永中為漢王曹王永功冀
王豳王永成吳王虞王永升隨王徐王永蹈衛王滕王
永濟潞王薛王永德瀋王乙酉詔諸有司凡承應人將
來受親民之職可命所屬諭使為學其護衛符寶奉御
奉職待直近密當選有德行學問之人為之教授六月

辛卯以廷臣諫罷圍獵乙未初置提刑司分按九路並
兼勸農採訪事屯田鎮防諸軍皆屬焉秋七月辛酉減
民地稅十之一河東南北路十之二下田十之三丁卯
以圖克坦克寧為太傅改封金源郡王辛巳詔京府節
鎮防禦州設學養士初設經童科以伊喇履為叅知政
事八月辛卯敕有司京府州鎮設學校處以進士提控
其事壬辰初定品官子孫試補令史格及提刑司所掌
三十二條丁酉如大房山戊戌謁奠諸陵己亥還都九

月戊午朔天壽節以世宗喪不受朝壬戌詔罷告捕亂
言人賞丁卯制強族大姓不得與所屬官吏交往違者
有罪丙子獵於近郊冬十月庚戌中侍舒穆魯阿古誤
帶刀入禁門罪應死詔杖八十一月癸亥帝謂宰臣
曰令之用人太拘資格張汝霖對曰不拘資格所以待
非常之材帝曰崔祐甫為相未踰年薦八百人豈皆非
常之材歟甲子諭尚書省太傅年高自今旬休外四日
一居休惟大事白之可也戊辰諭尚書省自今五品以

上官各舉所知歲限所舉之數如不舉者坐以蔽賢之
罪仍依唐制凡五品以上官到任即舉自代並從提刑
司採訪之已巳初制轉遞文字法乙亥命伊喇履提控
刊修遼史御史臺奏臺官不得與人相見無以訪知民
間利病官吏善惡詔自今許與四品以下官相見三品
以上如故辛巳詔今後諸處或有饑饉令總管節度使
或提刑司先行賑貸或賑濟然後言十二月丙戌詔罷
鑄錢壬辰諭有司女真人及百姓不得用網捕野物及

不得放羣鵬枉害物命亦恐女真人廢射也戊戌復置
北京遼東鹽使司仍罷巡鹽使賑寧化保德嵐州饑其
流移復業給復一年是日禁宮中上直官及承應人毋
得飲酒壬子帝諭臺臣曰提刑司所舉劾多小過行則
失大體不行恐有所沮其以此意諭之

明昌元年春正月丙辰朔改元不受朝賀辛酉諭尚書
省宰執所以總持國家不得受人餽遺或遇生辰受所
獻毋過萬錢若總大功以上親及二品以上官不禁壬

戊以王尉為尚書右丞完顏守貞為叅知政事戊辰制
禁自披剃為僧道者敕外路求世宗御書辛未如近畿
春水二月丙申詔諸王凡出獵毋越本境壬寅諭有司
寒食給假五日著於令甲辰還宮三月己未敕點檢司
諸試護衛人須身形及格若功臣子孫善射出衆雖不
及格亦令入見乙巳擊毬於西苑百寮會觀癸酉詔內
外五品以上歲舉廉能官一員不舉者坐蔽賢罪乙亥
初設應制及宏詞科丁丑制內外官并諸局承應人遇

祖父母父母忌日並給假一日辛巳詔修曲阜孔子廟
學夏五月乙卯初雨於北郊及太廟戊午拜天於西苑
射柳擊毬縱百姓觀壬戌祈雨於社稷甲子制省元及
四舉終場人許該恩己巳復祈雨於太廟庚午置知登
聞鼓院事一人丙子以祈雨望祭嶽鎮海瀆於北郊戊
寅命內外官五品以上任內舉所知才能官一員以自
代壬午以伊喇履為尚書右丞圖克坦鎰為叅知政事
六月己丑制定親王家人有犯其長史府掾失覺察故

縱罪秋八月癸未禁指托親王公主奴隸占網船侵商旅及妄徵錢債乙酉詔設常平倉己丑以宗寧為平章政事癸巳罷諸府鎮流泉務選才幹之官為諸州刺史皆召見諭戒之戊戌詔集百官議何以使民棄耒而務本以廣儲蓄戶部尚書鄧儼等曰今風俗侈靡宜定制度辨上下使服用居室各有差等抑昏喪過度之禮禁追逐無名之費用度有節蓄積自廣矣右丞履叅知政事守貞鑑曰凡人之情見美則願若不節以制度將見

奢侈無極費用過多民之貧乏殆由此致方今承平之

際正宜講究此事為經久法帝是履議

按弘簡錄止載後議總叙節儉

等名既失事實亦與詔集百官議句不合然金史載二議而說頗相同不應獨以履議為是即後議亦履與守貞鑑三人所同而云帝是履議似鑑與守貞又別有所議者恐係記載之誤今仍原文而識之 九月丙

辰以廉能進授北海縣令張翽等十八人官冬十月丙

申詔賜貴德州孝子翟巽遂州節婦張氏絹粟十一月

乙卯以惑衆亂民禁罷全真及五行毗盧戊辰諭王脩

張暉等曰朝廷可行之事汝諫官禮官即當辨析小民

之言有可採者朕尚從之况卿等乎自今所議毋但附合於尚書省十二月甲辰以克寧為太師尚書令封淄

王賜銀絹

二年春正月乙卯皇太后不豫自是日往侍疾丙夜乃還辛酉皇太后崩戊寅詔賜圖古勒部羊三萬口幣五百端絹二千匹以振其乏吳王永成隋王永升聞國喪奔赴失期罰其俸一月其長史笞五十己卯有司言漢

王永中以疾失期帝諭使回

按漢王永中傳載孝懿皇后崩永中適有寒疾不能

至帝怒遣使責之與此互异

二月丙戌禫祭永中始至入臨行燒飯

禮

按漢王永中傳載二月丙戌禫祭永中始至蓋永中先以有疾未奔喪至此自應奔臨本紀失載今據補

但永中傳載壬辰永中與諸王朝辭帝禮遇雖在而嫌忌自此始考章宗初年於諸王恩禮有加至四年鄭王永蹈謀逆後方有疎忌之心謂因奔喪一節早成嫌忌恐深丈不可為據也 壬辰敕親王及

三品官之家毋許僧尼道士出入諭有司進士程文但

合格者即取之毋限人數丙申以瓜爾佳清臣為尚書

左丞戊戌更定奴誘良人法夏四月戊子制諸部內災

傷主司應言而不言及妄言者等罪辛卯帝幸壽安宮

張暉等上疏請止其行不允癸巳詔女真字直譯為漢
字甲午改封永中為并王永功魯王永成克王永升曹
王永蹈鄭王永濟韓王永德幽王己亥學士院奏進唐
杜甫韓愈劉禹錫杜牧賈島王建宋王禹偁歐陽修王
安石蘇軾張耒秦觀等集二十六部壬寅詔襲封衍聖
公孔元措視四品秩五月庚戌敕自今四日一奏事仍
免朝秋七月丁巳以圖克坦鎰為尚書右丞瓜爾佳衛
為叅知政事己未觀稼於近郊己巳禁職官元日生辰

受所屬獻遺九月乙卯謁奠裕陵丙辰還都已未以瓜
爾佳清臣為平章政事封芮國公完顏守貞為尚書左
丞張萬公為叅知政事冬十月甲午敕司獄毋得與府
州官還往十一月丙午朔制諸女真人不得以姓氏譯
為漢字甲寅禁伶人不得以歷代帝王為戲戊午夏人
賊殺邊將阿嚕岱十二月己卯定鎮邊守將致盜賊罪
己酉詔罷契丹字

三年春二月甲戌朔敕明安穆昆許於冬月率所屬戶

畋獵二次每出不得過十日閏月甲子以烏凌阿愿為御史大夫三月辛卯詔賜棗州孝子劉瑜錦州孝子劉慶祐絹粟旌其門閭帝因問宰臣其人有可官使者守貞對以若輩多淳實不及事帝曰孝義之人素行已備稍可用即當用之後雖有希覬作偽者然偽為孝義猶不失為善可檢勘前後所申孝義之人可用者以聞癸巳忻州陳毅上書言事帝命左丞守貞問之其一極論守令之弊問所以救人之道莫之能言帝曰方今政欲

知其弊也彼雖無救弊之術但能言其弊亦足嘉矣如
殺言及有司不能奉行條制為人傭僱尚須出力况食
國家祿而乃如是得無虧臣子之行乎其令檢會前後
所降條理舉行之丁酉命有司祈雨望祀嶽鎮海瀆於
北郊夏四月壬寅朔定宣聖廟春秋釋奠禮甲辰祈雨
於社稷丙午罷天山北界外採銅詔賜雲內孝子孟興
絹粟賜同州人妻師氏諡曰節丙辰旱災下詔責躬遣
御史中丞吳鼎樞等會決中都冤獄外路委提刑司處

決左丞守貞以早上表乞解職不允叅知政事衡等入謝帝曰前詔開罷不急之後省無名之費議冗官決滯獄四事其速行之五月甲戌祈雨於社稷是日雨戊寅出宮女百八十三人尚書省奏山東河北饑已委宣差所至安撫賑濟復遣范文淵往視之乙酉以雨足致祭於社稷六月癸卯宰臣請罷提刑司帝曰諸路提刑司官止三十餘員猶患不得其人州郡三百餘處其能盡得人乎弗許丁巳定提刑司條制乙丑以劉瑋為尚書

右丞有司言河州災傷民乏食而租稅有未輸詔免之
秋七月戊寅敕尚書省曰飢民如至遼東恐難遽得食
必有飢死者其令散糧官問其所欲居止給以文書命
隨處官長計口分散令富者出粟養之限以兩月其粟
充秋稅之數癸未詔增北邊軍千二百人分置諸堡八
月癸卯敕諸職官老病不肯辭退有司諭使休閒者不
在給俸之列格前弗論帝以軍民不和吏員姦弊詔四
品以下六品以上集議於尚書省甲辰問三品以下六

品以上官朝政得失及民間利害令各書所對辛亥賜
胡光謙明昌二年進士第三甲及第授太常寺奉禮郎
舊設是職未嘗除人以光謙德行才能故特授之己未
以烏凌阿愿為尚書左丞乙丑帝謂宰臣曰朕欲任官
令久於其事若今日作禮官明日賜錢穀雖間有異材
然事能悉辦者鮮矣九月庚午諭尚書省去歲被災傷
處所閤租稅及借貸錢粟俟豐收日以分數察徵可也
又諭隨路提刑司舊止察老病不任職及不堪親民者

如得其實即改除他路若他路提刑司覆察得實勿復
注親民之職其集議速行之已卯如秋山免圍場經過
人戶今歲夏秋租稅之半曾當差役者復一年冬十月
壬寅至自秋山甲寅敕置常平倉處並令州府提刑縣
官兼管勾其事以所糴多寡約量升降以為永制戊午
諭尚書省訪求博物多知之士十一月丙子詔臣庶之
名有犯古帝王諱姓復同者禁之周公孔子之名亦令
回避甲申改提刑司令史為書史丙申以有司言河州

定羌民張顯孝友田力焚券已責又獻粟千石以助賑
饑詔特補兩官仍叙正班十二月辛亥諭有司祈雪丁
巳敕華州下邽縣京兆櫟陽縣許州舞陽縣隄所奏定
地名置倉各設倉官一人其都監縣官兼領之

四年春正月辛未以瓜爾佳清臣為尚書右丞相兼修
國史丁丑遣戶部侍郎李獻可等分路勸農事癸未尚
書省奏擢大興府推官蘇德秀為禮部主事帝曰朕既
嘗語卿等百官當使久於其職今德秀方任理官稱職

又除禮部人才豈能兼之如久於其職即中材勝於通
人事既經練亦必有濟後不可輕易改除又諭凡稱政
有異迹者謂其斷事有軼才也若止清廉此乃本分以
貧汙者多故顯其異耳宰臣言方今孝弟廉耻道闕乞
正風俗帝曰今之察舉官吏者多責近效以幹辦為上
其有秉心寬厚欲行德化者輒謂之迂濶故人人皆以
教化為餘事此孝弟所以廢也若敕所司擢舉務行德
化者則教化可行孝弟可興矣今所察舉皆先才而後

德巧猾之徒雖有贓污一旦見用猶為能吏此廉恥所以喪也若敕所司察舉官吏必審真偽使有才無行者不能覬覦非道求進者加之糾劾則奔競之俗息而廉恥可興矣辛卯賑河北諸路被水災者癸巳諭點檢司行宮外地及圍獵之處悉與民耕雖禁地聽民持農器

出入 恭讀通鑑輯覽

御批章宗以圍獵之地悉與民耕則講武且因之而廢蓋立國之道武備原不可一日而弛雖勸農稱善政而圍獵亦所以為民聖諭以承祖父基業不可變其舊俗為訓真萬世經久之謨

猷也謹錄識之丙申東京路副使王勝進鷹遣諭之曰汝職非

輕民間利害官吏邪正畧不具聞而乃以鷹進此豈汝所職也後毋復爾二月戊戌朔始以春秋二仲月上戊日祭社稷三月戊辰朔諸路提刑司入見識諭之曰朕特設提刑司本欲安民於今五年效猶未著蓋多不識大體徒事細碎以致州縣畏縮而不敢行事迺者山東民艱於食嘗遣使賑濟蓋卿等不職故至於此既往之失其思悛改以胥持國為叅知政事甲午定配享功臣

夏四月癸卯百官請上尊號帝以比年五谷不登百姓
流離正當戒懼修身之日豈得虛受榮名不許戊申親
禘於太廟辛亥右丞相清臣等及學官劉璣率六學諸
生請上尊號如唐元和故事不許敕女真進士及第後
仍試以騎射中選者升擢之五月丙寅朔曹王永升及
諸王請上尊號不許辛巳敕諸路月具雨澤田禾分數
以聞六月壬戌以完顏守貞為平章政事秋七月己丑
制三品以上有故者若親賢勲舊尚書省即與聞奏議

加追贈以同判大睦親府事襄為樞密使八月丁未釋
奠孔子廟北面再拜九月甲子朔天壽節御大安殿受
親王百官及宋高麗夏使朝賀戊辰以瓜爾佳衡為尚
書右丞馮琪為叅知政事冬十一月丙戌詔藏職官以
贓污不職被罪以廉能獲升者列其姓名揭之公署以
示勸懲十二月甲午諭大興府於暖湯院日給米五石
以贍貧者戊戌定武軍節度使鄭王永蹈以謀反伏誅
己亥諭有司以鄭王財產分賜諸王澤國公主財物分

賜諸公主庚戌詔有司會試毋限人數是歲大有年

五年春正月乙丑尚書省進區田法詔相其地宜務從
民便又言遣官勸農之擾命提刑司禁止之乙亥以頁
嚕古紳始製女真字詔加封贈依蒼頡立廟蓋屋例祠
於上京納爾琿莊本路官及其子孫春秋致祭辛巳諸
路所舉才德之士文商等詔賜獎賞自後屢擢薦舉之
士乙酉初定長史勸課能否賞罰格詔購求宗文總目
內所闕書籍二月己酉宰臣請罷北邊屯駐軍馬不允

癸丑命伊喇敏持嘉錫爾格相視北邊營屯經畫長久之計三月壬申初定限錢禁庚辰詔定日月風雨雷神常祀戊子置弘文院譯寫經書夏四月己酉詔自今筐櫝牀榻之飾毋以金玉乙卯辛景明宮六月宋前主春殂秋七月戊辰獵於和濟格爾八月辛亥至自景明宮九月乙丑帝御睿思殿諸路提刑司入見戊辰初令民買撲隨處金銀銅冶敕尚書省集百官議備邊事甲申命上京等九路并諸茂及紉等處選軍三萬俟來春調

發仍命諸路并北準布以六年夏會兵臨潢冬十月庚戌張汝弼妻高托噶以謀逆伏誅壬子尚書省奏升提刑司所察廉官大興主簿蒙古滿都在其中帝曰滿都澆浮人也與其任澆浮孰若用淳厚使才智過人猶不當用况常才耶其再察之閏月甲子親王百官及六學諸生屢奉表請上尊號不允戊寅帝問輔臣孔子廟諸處何如守貞對曰諸縣見議建立帝因曰僧徒修飾宇像甚嚴道流次之惟儒者於孔子廟最為減裂守貞曰

儒者不能長居學校非若僧道久處寺觀帝曰僧道以佛老營利故務在莊嚴閎侈起人施利所以為觀美也

丙戌以鄂屯忠孝溫昉修治河防十二月辛酉平章政

事完顏守貞為胥持國所忌罷去

按完顏守貞剛忠明亮稱賢宰執故明昌

之治具有可觀自胥持國既進而守貞乃不能安金史止載其罷而未指以胥持國之故於原委不能了然茲據續通鑑綱目補輯以尼瑪哈鑑為叅知政事丁卯免被黃河水

災處今年秋稅辛巳敕減修內司備營造軍千人都城

所五百人

六年春正月辛卯敕有司給天水郡公家屬田宅壬寅如春水庚戌罷陝西括地辛亥諭胥持國河上役夫聚居恐生疾疫可廩醫護視之乙卯次御林二月丁巳朔敕有司行宮側及獵所有農者勿禁庚午至自春水三月丙戌朔日有食之甲午以富珠哩子元田仲禮等為司諫拾遺諭之曰國家設置諫官非取虛名蓋責實效庶幾有所裨益卿等皆朝廷選擢置之諫職如國家利害官吏邪正極言無隱近路鐸左遷本以他罪卿等勿

以被責遂畏縮不言也戊戌括群牧所三招討司明安
穆昆隨亂及德呼勒唐古部諸茂西京太原官民馳五
千充北邊糧運其以駝載為業者勿括敕取銀絹金盃
等物以備支給賞勞夏四月癸亥增修曲阜宣聖廟工
畢賜衍聖公以下三獻法服及登歌樂一部甲子以烏
凌阿愿為平章政事瓜爾佳銜為尚書左丞戊寅以修
河防工畢叅知政事胥持國進官二階翰林待制鄂屯
忠孝以下三十六人各一階獲嘉令王維翰以下五十

六人各賜銀幣有差庚辰以瓜爾佳清臣為左丞相監
修國史襄為尚書右丞相胥持國為尚書右丞壬午賜
宰臣手詔以風俗不淳官吏苟且責之五月丙戌命減
萬寧宮陳設九十四所辛卯以出師遣禮部尚書張暉
告於廟社乙未判平陽府事鎬王永中及其二子以罪
賜死乙巳詔諸路明安穆昆農隙講武本路提刑司察
其惰者罰之庚戌命左丞相瓜爾佳清臣行省於臨潢
府六月丙寅以唐古貢為樞密使辛巳左丞相清臣遣

使來獻捷秋八月己巳以溫都伯英言命禮部令學官
講經壬申行省都事通吉永中來報捷九月丙戌以伊
喇仲方為御史大夫冬十月乙亥命瓜爾佳衡行省於
撫州命選親軍武衛軍各五百人以從十一月戊子左
丞相瓜爾佳清臣罷右丞相襄代領行省事甲辰報敗
敵於望雲乙巳以唐古貢伊喇仲方張暉等二十三人
充計議官凡軍事則議之戊申初定縣官增水田陞除
制十二月戊午禮部尚書張暉等進大金集禮庚辰帝

幸後園閱軍器右丞相襄率駙馬都尉布薩揆等進軍
大鹽濼分兵攻取諸營

承安元年春正月甲申大鹽濼郡牧使伊喇覲等為光
嘉喇部兵所敗死之丁亥國子學齋長張守愚上平邊
議三篇特授本學教授仍以其議付史館二月初造虎
符發兵三月癸卯敕尚書省刑獄雖已奏明其間恐有
疑枉其再議以聞人命至重不可不慎也夏四月壬子
遣使審決寃獄戊午初行區種法民十五以上六十以

下有土田者丁種一畝五月庚辰朔觀稼於近郊因閭
區田乙酉以久旱徙市庚子大雨六月甲寅以百姓艱
食詔出倉粟十萬石減價糶之秋七月庚辰御紫宸殿
受諸王百官賀乙酉命有司收瘞西北路陣亡骸骨冬
十月丙午朔詔選親軍八百人戍撫州庚戌命左丞相
襄行省於北京簽書樞密院事完顏匡行院於撫州丙
辰裕享於太廟十一月庚寅特們群牧契丹圖卜蘇德
壽反泰州軍擊敗之御史大夫董師中北京留守喬並

為叅知政事丁酉朝享於太廟戊戌有事於南郊大赦
改元十二月丙午樞密使唐古貢率百官請上尊號不
允己酉遣提點太醫近侍局使李仁惠勞賜北邊將士
授官者萬一千人授賞者幾二萬人凡用銀二十萬兩
絹五萬匹錢三十二萬貫

二年春正月乙酉敕職官犯贓私不得訴於同官二月
特命襲封衍聖公孔元措世襲兼曲阜令三月壬午命
溫昉佩金符行六部尚書於撫州庚寅辛酉圍閩軍器

辛卯始定保舉德行才能格丁酉以叅知政事喬代左丞相襄行省於北京夏四月尚書省奏比歲北邊調度頗多請降僧道空名度牒以助軍需從之癸酉親王宣敕始用女真字五月甲戌朔諭宰臣曰比以軍須隨路賦調司縣不度緩急促期徵歛使民費及數倍胥吏又乘之以侵暴其令提刑司究察之丙子再諭官吏今紀綱不立官吏弛慢遷延苟簡習以成弊職官多求善名計得自安國家何賴焉至於徇情賣法省部令史尤其甚

自今其戒勉之丁丑北京行省裔移駐臨演府六月戊申敕王遵古霖雨免入直以年老且嘗侍講讀也庚戌罷瑤光殿工作秋八月庚辰敕計議官所進奏帖可直言利害勿用浮辭辛巳以邊事未寧詔六品以上官議攻守之計凡中外臣僚不以職位高下或有方畧材武或長於調度各舉三五人以備選用議者凡八十四人言攻者五守者四十六且攻且守者三十三召對睿思殿論難久之丙戌以左丞相襄為左副元帥右丞胥持

國以有罪免

按晉持國柔侑有智術是時章宗李妃寵幸擅政持國陰附結之以傾善類至是為

言者所論以有罪免金火稱為致仕未得其實茲據續通鑑綱目改補

壬辰以左副元帥

襄為樞密使兼平章政事九月壬寅遣官分詣上京東

京北京咸平臨潢西京等路招募漢軍不足則簽補之

乙巳詔許復夏國保安蘭州榷場癸丑以鈕祐祿額特

埒為平章政事辛酉以樞密使襄知大興府事晉持國

為樞密副使權叅知政事行省於北京冬十月庚午朔

初設講議所官十員共議錢穀以孫鐸高汝礪等為之

壬辰詔獎諭布薩揆等有功將士甲午大雪以米千石
賜普濟院令為粥以食貧民十一月乙巳以薪貴敕圍
場地內毋禁樵採壬子諭尚書省明安穆昆既不隸提
刑司宜令監察御史察其臧否十二月己巳朔敕御史
臺糾察諂佞趨走有實跡者癸未遣戶部侍郎上官踰
體究西京逃亡勸率沿邊軍民耕種戶部郎中李敬義
規指臨潢等路農務乙酉諭宰臣今後水潦旱蝗盜賊
竊發命提刑司預為規畫

三年春正月己亥朔日有食之辛丑宋夏遣使來賀癸卯諭有司凡館接伴并奉使者毋以語言相勝務存大體奉使者亦必得其人乃可乙卯詔罷講議所丁巳併上京東京兩路提刑司為一提刑使副魚安撫使副安撫專掌教習武事毋令改其本俗二月辛巳諭宰臣曰自今內外官有闕如有才能可任者雖資歷未及亦具以聞雖親故毋有所避丙戌薩察內附三月戊戌以張曄為御史大夫壬寅始榷醋丁巳敕隨處盜賊毋以強

為竊以多為少以有為無嘯聚三十人以上奏聞違者杖百丙寅高麗王王皓以弟暉權國事遣使奉表來告遣孫俱往高麗宣問夏四月丙申諭御史臺曰隨朝大小官雖有才能率多苟簡朕甚惡之其察舉以聞提刑司所察廉能汙濫官皆當劾奏餘事可轉以聞庚子張汝方以漏泄廷議削官兩階五月壬寅射柳擊毬縱百姓觀秋八月庚辰以護衛石和尚為押軍萬戶率親軍八百人武衛軍千六百人戍西北路冬十月丁亥定官

民存留見錢之數設回易務更立行用鈔法十一月丁酉樞密使襄至自軍癸卯以為尚書左丞相監修國史戊申詔獎諭樞密副使瓜爾佳衛以下將士以邊事定詔中外減死罪徒以下釋之賜左丞相襄以下將士金幣有差十二月甲子朔獵於酸棗林大風寒罷獵凍死者五百餘人

四年春正月辛酉以瓜爾佳衛為平章政事起復張萬公為平章政事楊伯通為尚書左丞簽樞密院事完顏

匡為尚書右丞二月庚午御宣華門觀迎佛土申諭有
司自今每旬三品至五品官各一人轉對有應奏事與
轉對官相見無面對者上章亦聽戊寅如建春宮庚辰
諭點檢司曰自蒲河至長河及細河以東朕常所經行
官為和買其地令百姓畊之仍免其租稅甲申還宮乙
酉以布薩揆治邊有功召為叅知政事三月丁酉以宗
浩為樞密使己亥遣使冊王暉為高麗國王丁未敕尚
書官員必須改除者議之其月日淺者毋數改易夏四

月壬午進封英王從憲為瀛王五月壬辰朔以旱下詔責躬求直言避正殿減膳審理冤獄命奏事於泰和殿戊戌命有司望祭嶽瀆禱雨己亥應奉翰林文字陳載言四事其一邊民苦於寇掠其二農民困於軍須其三審決寃滯一切從寬苟縱有罪其四行省官員例獲厚賞而沿邊司縣曾不霑及此亦干和氣致旱災之所由也帝是之戊申宰臣以京畿雨率百官請御正殿復常膳不從庚戌帝諭宰臣曰諸路旱或闕執政今惟大興

宛平兩縣不雨得非其守令之過歟司空襄平章政事
萬公叅知政事揆上表待罪帝以罪已答之令各還職
壬子祈雨於太廟六月丁卯雨司空襄以下屢表請御
正殿復常膳至是從之丁丑右補闕楊庭秀言自轉對
官外復令隨朝八品以上外路五品以上及出使外路
有可言者並許移檢院以聞則時政得失民間利病可
周知矣從之癸未奉職醜和尚進浮漏水稱影儀簡儀
圖命有司依式造之丁亥定宮中親戚非公事傳達語

言轉遞諸物及書簡出入者罪秋七月辛亥敕宣徽院
官天壽節凡致仕宰執悉召與宴八月甲戌以皇嗣未
立命有司祈於太廟冬十月乙未敕京府州縣設普濟
院每歲十月至明年四月設粥以食貧民十二月右補
闕楊庭秀請類集太祖太宗世宗三朝聖訓以時觀覽
從之仍詔增熙宗為四朝


五年春正月乙未尚書省言會試取士不得過六百人
不及其數則闕之庚子命左右司五日一轉奏事庚戌

定明安穆昆軍前怠慢罷世襲制二月丁未帝與宰臣
論置相曰圖克坦鎡朕志先定賈鉉如何皆曰知延安
府事孫即康可平章政事且先鉉一榜帝曰論相安問
榜次特以賈才可用耳右補闕楊庭秀言乞令尚書省
及第左右官一人應入史事者編次日歷或一月或一
季封送史院帝是其言仍令送著作局潤色之三月癸
亥孫鐸完顏薩喇蒙古仁本白對便殿庚午以下為御
史大夫丙子尚書省奏擬同知商州事富察錫津為濟

南府判官帝曰宰相豈可止徇人情要當重惜名爵此
人不堪朕常記之止與七品足矣庚辰以圖克坦鎡為
平章政事辛巳定本國婚聘禮制夏五月乙卯朔定明
安穆昆闖毆殺人遇赦免死罷世襲制秋七月癸亥定
居祖父母喪婚娶聽離法初置富森群牧九月戊午命
宗浩賈鉉佩金符行省山東等路括地己未通吉思忠
言各路邊堡牆隍西自塔布色東至呼爾根幾六百里
向以起築忽遽並無女牆副隄近令修完計工七十五

萬止役戍軍未嘗動民今已畢功賜詔獎諭修玉牒成
定皇族收養異姓男為子者徒三年同姓者減二等立
嫡違法者徒一年冬十月辛丑集百官於尚書省問問
者亢旱近則久陰豈政有錯謬而致然歟各以所見對
十一月癸丑朔日有食之乙卯以呂卿雲為左補闕審
官院以資淺駁奏帝諭之曰明昌間卿雲嘗上書言宮
掖事辭甚切直皆他人不能言者卿輩蓋不知也臣下
言事不令外人知乃是謹密正當顯用卿宜悉之十二

月癸未朔詔改明年元乙未詔宮籍監戶百姓自願以
女為婚者聽



欽定續通志卷五十二

欽定四庫全書

史部

欽定續通志卷五十六

三至六

主事_臣尹壯圖覆勘

總校官原任侍講臣王燕緒

欽定四庫全書

欽定續通志卷五十三

金紀七

章宗二

衛紹王

泰和元年春正月己巳太府監孫復言方今在仕者三萬七千餘員而門廕補叙居三之二諸司待闕動至累年蓋補廕猥多流品混淆本末相舛至於進納之人既無勞績又非科第而亦廕及子孫無所分別欲流之清

必澄其源乃更定廢叙法尚書省奏今杖式輕細民不知畏請用大杖詔不許過五分三月辛巳敕官司私文字避始祖以下廟諱小字犯者論如律夏四月甲辰詔諭契丹人戶累經簽軍立功者官賞恩例與女真人同仍許養馬為吏五月戊寅削尊長有罪卑幼追捕律六月己亥申明舊制明安穆昆戶每田四十畝樹桑一畝毀樹木者有禁鬻地土者有刑其田多汙菜人戶闕乏并坐所臨長吏按察司以時勸督仍減牛頭稅三之一

敕尚書省舉行風俗奢僭之禁乙巳初許諸科徵舖馬
黃河夫軍須等錢折納銀一半願納錢鈔者聽秋七月
甲子諭刑部官凡上書人言及宰相者不得申省八月
壬寅制明安穆昆並隸按察司監察御史止按部糾舉
有罪則併坐監臨之官詔推排西北京遼東三路人戶
物力九月定贍學養士法生員給民佃官田人六十畝
歲支粟三十石國子生人百八畝歲給以所入官為掌
其數冬十月壬辰御史臺奏在制按察司官比任終遣

官考覈然後尚書省命官覆察之今監察御史添設員
多宜分路巡行每路女真漢人各一人同往從之壬寅
敕有司購遺書宜償其價以廣搜訪藏書之家有珍惜
不願送官者官為謄寫畢復還之仍量給其直之半十
一月丁巳諭工部曰比聞懷州有橙結實官吏檢視已
嘗擾民今復進柑得無重擾民乎其誠所司遇有則進
無則已十二月丁酉司空襄等進新定律令敕條格式
五十二卷辛丑詔頒行之

二年春正月乙卯始朝獻于衍慶宮夏四月辛丑諭御
史臺諸訴事于臺當以實上聞不得輒稱察知五月甲
辰朔日有食之壬戌諭有司曰金井巴納不過二三日
留朕之所止一涼厦足矣若加修治徒費人力其藩籬
不及之處用圍幕可也已巳敕御史臺京師拜廟及巡
幸所過州縣止令灑掃不許以黃土覆道六月辛卯諭
尚書省諸路禾稼及雨多寡令州郡以聞秋八月丁酉
皇子生九月甲寅以拱衛直都指揮使完顏瑋等為賀

宋生日使且戒之曰兩國和好矣汝不宜爭細故傷大體庚午封皇子為葛王冬十一月甲辰更定德運為土臘用辰以宗浩為樞密使十二月癸酉以皇子晬日放僧道戒牒三千閏月辛酉定人戶物力隨時推收法

三年春正月己卯以宗浩為尚書右丞相完顏匡為左丞布薩揆為右丞孫即康賈鉉並為參知政事三月丁亥定從人銅牌賣毀罪賞制夏四月乙巳禘于太廟敕致仕官入宮年高艱于步履者並聽策杖仍令舍人護

衛扶之五月丙戌以定律令正土德鳳凰來皇嗣建大赦辛卯皇子葛王薨壬辰定擅增減宮門鎖鑰罪六月壬寅詔選聰明方正為修起居注又詰點檢司諸親軍所設教授及授業人若干其為教何法通大義者幾人各具以聞秋九月壬辰詔定千戶穆昆受隨處捕盜官公移盜急不即以衆應之者罪有差冬十月庚申奉御完顏阿嚕岱使宋還言宋權臣韓侂胄市馬厲兵將謀北侵帝怒以為生事答之五十出為彰德府判官及淮

平陷乃擢為安國軍節度副使丁卯諭尚書省士庶陳
言可悉令詣闕量與食直仍給官舍居之其言切直及
繫利害重者並三日內奏聞十一月甲午詔監察等察
事可二年一出十二月庚子諭宰臣曰賀正宋使且至
可令監察隨之以為常辛亥詔諸親王公主每歲寒食
十月朔聽朝謁興裕二陵忌辰亦如之癸丑詔遣監察
御史分按諸路所遣者女真人即以漢人朝臣偕所遣
者漢人即以女真朝臣偕

四年春正月丁丑尚書省奏宋賀正使還至慶都道卒
詔遣防禦使努色爾徃祭賻以絹布命送伴使張雲護
喪以歸二月丁酉以山東河北旱詔祈雨東北二嶽庚
戌始祭三皇五帝四王癸丑詔凡州郡無宣聖廟學者
並增修之三月癸酉命大興府祈雨戊寅詔定前代帝
王合致祭者尚書省奏三皇五帝四王已行三年一祭
之禮若夏太康殷太甲太戊武丁周成王康王宣王漢
高祖文景武宣後漢光武明章唐高祖文皇一十七君

致祭為宜從之壬辰遼陽府判官錫默瑠嘉以上書論
列朝臣削官一階罷之夏四月丙申詔定縣令以下考
課法丙午定衣服制甲寅以久旱下詔責躬求直言避
正殿減膳撤樂省御廄馬免旱災州縣徭役及今年夏
稅遣使審繫囚理寃獄乙卯宰臣上表待罪詔答曰朕
德有愆上天示異卿等各趨乃職思副朕懷五月甲戌
雨乙亥百官上表請御正殿復常儀乙酉謝雨于宗廟
丁亥報祀社稷汰隨朝冗官六月壬辰朔罷兼官俸給

秋八月丁酉以崇浩為左丞相布薩揆為平章政事孫
即康為尚書右丞布薩端為左丞通吉思忠為參知政
事庚子詔完顏綱喬宇宋元吉等編類陳言文字其言
涉宮庭若大臣省臺六部各以類從凡二千卷辛丑以
崇肅為御史大夫癸卯尚書省奏前以天旱詔求直言
河南府盧顯達汝州王大材所陳言涉不遜請論其罪
從之減教坊長行五十人渤海教坊長行三十人文繡
署女工五十人出宮女百六十人九月壬申定屯田戶

自種及租佃法冬十月丙申詔親軍三十五歲以下習
孝經論語十二月辛丑敕陝西河南饑民所鬻男女官
為贖之

五年春正月乙亥詔有司自太和三年郡縣三經行幸
民嘗供億者賜今年租稅之半丁丑調山東河北軍夫
改治漕渠二月己丑朔諭各路按察使限于近制各務
因循莫思舉刺郡縣以貪黷相尚莫能畏戢自今若糾
察得實民無冤滯能使一路鎮靜者為稱職其或煩紊

使民不得伸愬者為曠廢三月乙丑宋兵入秦川界甲戌諭有司進士名有犯孔子諱者避之仍著為令命給米諸寺自十月十五日至次年正月十五日作糜以食貧民辛巳宋兵入鞏州唐州得宋牒者言韓侂曹屯兵鄂岳將謀北侵夏四月癸巳命樞密院移文宋人依誓約撤新兵毋縱入境壬子定隨路轉運司每季檢視庫物法五月甲子以布薩揆為河南宣撫使籍諸道兵以

備宋

按續通鑑綱目載金章宗以宋事問大臣皆謂宋不敢渝盟及聞完顏匡言乃命布薩揆宣撫河南

據此則非因唐州得宋勝者言而備宋也與金史異

甲申宋人破漣水縣六月戊

子復之己酉制鎮防軍逃亡致邊事失錯陷敗戶口者

罪甲寅召諸大臣問備宋之策皆以設備養惡為言帝
以南北和好四十餘載民不知兵不忍先發秋七月壬
午詔諸縣盜賊多所選注巡尉八月辛卯詔罷宣撫司
時宋殿帥郭倪濠州守將田俊邁誘虹縣民蘇貴等為
間河南將臣亦屢縱謀往往利俊邁之賂皆為游說言
宋之增戍本虞他盜及聞行臺之建亦不敢去備且兵

皆白丁自裹糧糒窮蹙飢疫死者十二三由是中外信
之宣撫司以宋三省樞密院及盱眙軍謀來上又皆鑄
黜邊臣為辭宣撫使揆因請罷司從之揆又奏罷臨洮
德順秦鞏新置弓箭手九月戊戌宋攻北陽寺莊副巡
檢阿里哈肆嘉弩死之甲辰宋人焚黃澗執巡檢高顥
冬十月丁丑宋人襲北陽唐州軍事判官索多死之十
一月乙酉宋人攻固縣商州司獄壽祖擊敗之己丑以
太常卿趙之傑等為賀宋正旦使

按宋史載金史趙之傑入見禮甚倨是時

兵釁之開實先自宋如謂金使入見禮倨則似金欲南
侵而先以使臣之倨挑之如海陵之使王全者然考績
通鑑綱目載金使趙之傑入見韓侂胄故使贊者犯金
主父嫌名以挑之金使怒遂無禮于事實原委甚晰

癸巳山東闕食賜錢三萬貫以賑之丁酉詔山東陝西
帥臣訓練士卒以備非常仍以銀十五萬兩分給邊帥
募民傾伺復遣完顏太平富察阿里赴邊伺其入伏兵
掩之宋吳曦擁衆興元欲窺闕隴皇甫斌益募兵擾淮
北

六年春正月丁亥宋賀正使陳克俊等朝辭遣御史大

夫孟鑄諭之曰大定初世宗皇帝許宋世為姪國朕遵
守遺法和好至今豈意爾國屢有盜賊犯我邊境以此
遣大臣宣撫河南軍民及得爾國有司公移稱已罷黜
邊臣抽去兵卒朕方以天下為度不介小嫌遂罷宣撫
司比來盜賊甚于前日羣臣屢以爾國渝盟為言朕惟
和好歲久委曲涵容恐姪宋皇帝或未詳知若依前不
息臣下或復有云朕雖兼愛生靈事亦豈能終已卿等
歸國當以朕意具言之汝主丙申宋吳曦遣兵圍穆舒

隆堡部將布希長安擊走之癸卯始以沿河縣官兼管
勾漕河事州府官兼提控庚戌宋人入薩滿谷陝西
統軍判官完顏果囉鞏州兵馬鈐轄完顏齊錦約宋西
和州守將會境上俄伏發為所襲木波部長趙彥雄等
七人死焉二月甲戌御史中丞孟鑄言提刑改為按察
司又差官覆察權削而望輕非便參知政事賈鉉曰按
察司既差監察體訪復遣官覆察之誠為繁冗請自今
差監察時即遣官與俱更不覆察從之三月甲午尚書

省奏商州刺史烏庫哩揚珠請賻押軍官與南兵戰沒者又奏遷右振肅富察烏錦官皆從之己酉宋人攻靈壁夏四月丙辰宋人圍壽春亳州同知防禦使賢聖努擊却之河南統軍使赫舍哩子仁言宋皇甫斌遣兵四萬規取鄧以我叛人田元為鄉導三萬人規取唐以張貞張勝為鄉導俱授統領官故不敢無備乃聚鄭汝陽翟之兵于昌武以赫舍哩毅統之聚亳陳襄邑之兵于歸德以圖克坦鐸統之而自以所部兵駐汴及擬山東

東西路軍七千付統軍赫舍哩執中駐大名河北東西
路軍萬七千屯河南皆給以馬從之甲子宋人攻天水
界部將劉鐸戰敗之丙寅詔平章政事布薩揆領行省
于汴許以便宜從事升諸道統軍司為兵馬都統府以
赫舍哩執中為山東西路兵馬都統使完顏薩喇副之
陝西統軍使充為陝西五路兵馬都統使和碩舒穆魯
仲溫副之皆聽揆節制盡徵諸道兵辛未宋吳曦攻來
遠鎮之蘭家嶺丁丑宋人入新息內鄉又入泗州褒信

虹縣頴上五月壬午宋李爽圍壽州田俊邁入蘄縣秦
詵攻蔡州防禦使完顏佛珠敗之又入金城海口殺長
山尉執二巡檢以去丙戌以宋畔盟出師告于天地太
廟社稷戊子加揆蕪左副元帥克為元帥右監軍烏
庫哩誼為元帥左都監辛卯以征南詔中外帝以東北
新調之兵未集河南之衆不足支命河北大名北京天
山之兵萬五千屯真定河間清獻等處以為應壬辰諭
尚書省今國家多故凡言軍國利害五品以上官以次

奏陳朕將親問之六品以下則具帖子以進癸巳以完
顏匡為右副元帥宋田俊邁攻宿州納喇邦烈等出兵
擊之邦烈中流矢宋郭倬李汝翼以衆繼至遂圍宿州
壬寅納喇邦烈等擊敗之俊邁退保于蘄執之甲辰皇
甫斌攻唐州刺史吾克遜鄂屯泌陽副巡檢納哈塔軍
勝合擊敗之六月辛亥平章政事揆報蘄之捷并送所
獲宋將田俊邁至闕帝降詔褒諭賜赫舍哩貞納喇邦
烈薩克達等爵賞有差宋將李爽圍壽州刺史圖克坦

羲拒守踰月河南統軍判官奇珠及邁格等來援羲出兵應之爽大敗同知軍州事布埒庫中流矢死乙卯初置急遞鋪腰鈴轉遞日行三百里非軍期河防不許起馬丁已詔彰德府宋韓侂胄祖琦墳毋得損壞仍禁樵採庚申右翼都統完顏薩布敗宋曹統制于溱水壬戌平章政事揆報壽州之捷戊辰詔升壽州為防禦免今年租稅諸科名錢釋死罪以下以圖克坦羲為防禦使贈布埒庫昭勇大將軍賜錢三百貫官其子圖喇擢奇

珠同知昌武軍節度使事邁格河南路統軍判官都統
薩布副統布希萬努各進爵一級賜金幣有差乙亥宋
吳曦攻鹽川戍將完顏王喜敗之秋七月癸未宋商榮
復攻東海縣令完顏縵森復敗之還中伏矢死贈海州
刺史以銀絹給其家仍官其一子甲午宋統制戚春以
舟師攻邳州刺史完顏從正敗之春赴水死吳曦兵入
秦州陝西路都統副使承裕等敗之丙申夏國王李純
佑廢姪安全立八月庚戌山東帥來報邳州之捷辛未

宋程松襲取方山原富察貞破走之乙亥赦唐鄧穎蔡宿泗六州免來年租稅三分之一九月辛巳富察貞取和尚原臨洮蕃部遵寧獻芻粟戰馬以助軍庚寅敕行尚書省有方畧出衆武藝絕倫才幹辦事工巧過人者其招選之戊戌布薩端行省于汴己亥梁鏜行六部尚書事于山東甲辰宋吳曦將馮興楊雄李珪等入秦州陝西都統副使承裕等擊破之斬楊雄李珪冬十月戊申朔平章政事布薩揆督諸道兵伐宋庚戌揆以行省

兵三萬出潁壽赫舍哩子仁以兵三萬出渦口匡以兵二萬五千出唐鄧赫舍哩執中以山東兵二萬出清口充以關中兵一萬出陳倉富察貞以岐隴兵一萬出成紀完顏綱以漢蕃步騎一萬出臨潭舒穆魯仲溫以隴右步騎五千出鹽川完顏璘以本部兵五千出來遠十一月壬午完顏匡攻下棗陽丁亥布薩揆克安豐軍取霍丘縣赫舍哩執中克淮陰遂圍楚州庚寅完顏匡克光化軍壬辰布薩揆次廬江宋督視江淮兵馬事丘寔

遣劉祐來乞和赫舍哩子仁克定遠縣乙未完顏匡取
隨州丙申赫舍哩子仁克滁州戊戌完顏匡圍德安別
以兵狗下安陸應城雲夢孝感漢川荆山等縣庚子完
顏綱圍祐州降之宋丘密遣林拱持書乞和辛丑完顏
匡攻襄陽破其外城布薩揆克舍山富察貞克天水赫
舍哩子仁徇下來安全椒二縣壬寅完顏綱徇下荔川
閬川等城癸卯丘密復遣宋顯等以書幣乞和乙巳完
顏綱克宕昌丙午富察貞克西和州十二月丁未朔完

顏匡克宜城布薩揆攻和州薩克達中流矢死壬子完顏綱下大潭縣富察貞克成州癸丑宋昭信軍節度使

四川宣撫副使吳曦納款于完顏綱

按吳曦叛降事續通鑑綱目載在是

年六月以前宋史亦載四月吳曦獻關外四州于金求封蜀王六月金人封吳曦為蜀王而金史載十二月始納款于完顏綱綱以朝命立曦為蜀王時日與兩書均異戊午充攻下大散關己未

赫舍哩子仁克真州丘密復遣陳璧等奉書乞和辛酉充遣烏雅綽哈以兵趨鳳州城潰入焉完顏綱遣張仔會吳曦于興州之置口曦仍獻階州乙丑平章政事布

薩揆班師完顏綱以朝命使馬良顯齎詔書金印立吳
曦為蜀王戊辰富察貞以西和天水等捷來報己巳曦
遣郭澄任辛奉表及蜀地圖志吳氏譜謀來上壬申詔
完顏匡權尚書右丞行省事右副元帥如故以赫舍哩
執中縱下虜掠遣近臣杖其經歷伊爾必斯等仍詔放

還所掠

按續通鑑綱目載是歲蒙古却特特穆津稱帝于鄂諾河考金史于凡僭位稱尊者雖經勦滅

之後必書其原委乃于元初獨闕而未載即宋史記開禧二年事亦未及此今仍其舊而附識之

七年春正月丁丑完顏匡進攻襄陽戊寅敕宰臣舉材

幹官同議南征事辛巳詔崇肅圖克坦懷忠范楫高汝礪張行簡溫特赫思齊等十有四人同對于慶和殿壬午詔百官及前十四人同對于廣仁殿乙酉贈壽州死節軍士魏全宣武將軍封其妻鄉君子埃充正班局分承應仍賜錢百萬初李爽圍壽州刺史義募人往斫敵營全在選中為敵所執敵令罵義則免全反罵敵遂殺之故有是恩戊子召完顏綱赴闕庚寅布薩揆還駐下蔡而病丙申以崇浩兼都元帥行省于南京以代揆辛

丑完顏匡取穀城二月丙辰赦鳳成西和階山五州丁巳宋知樞密院張巖遣方信孺以書詣平章政事揆乞和完顏匡克荆門軍吳曦遣使奉三表來謝封爵陳誓言賀全蜀內附戊辰平章政事兼左副元帥布薩揆薨于軍癸酉遣珠格高琪等冊吳曦為蜀國王是月蜀國王吳曦為宋臣安丙所殺三月庚寅詔撫諭陝西軍士壬辰宋復攻破階州癸巳復攻破西和州乙未宣撫副使完顏綱至鳳翔詔撤五州之兵分保要害綱召諸軍

還庚子以完顏匡為左副元帥夏四月癸丑宋人攻破散關烏雅愛實死之丙辰以赫舍哩子仁為右副元帥戊辰詔元帥府分遣諸將遊奕淮南諸州癸酉復下散關五月丙申宋張巖復遣方信孺以書至都元帥府增歲幣乞和宋四川安撫使安丙遣李孝義率步騎三萬攻秦州圍皂角堡珠格高琪以兵赴之七戰解其圍六月己酉以山東盜制同黨能自殺捕出首官賞法戊午烏庫哩誼為元帥左監軍完顏薩喇為元帥左都監秋

七月壬午詔民間交易典質一貫以上並用交鈔母用
錢乙酉敕尚書省自今初受監察者令進利害帖子以
待召見甲子左副元帥匡至自許州乙未詔覈西夏人
口盡贖放還有藏匿者以違制論八月戊申宋張巖復

遣方信孺齋其主誓書藁來乞和

接方信孺之使金據續通鑑綱目作開禧

三年二月宋史作四月金史載二月五月八月三至俱奉書乞和而宋史乃稱奉書通謝彼此互異考是時金師未退和議未許其大散關濠州俱未歸則安得先為通謝也當以金史所載為正九月甲戌朔

左丞相兼都元帥崇浩薨于軍甲申以布薩端為平章

政事完顏匡為平章政事兼左副元帥壬寅敕女真人不得改為漢姓及學南人裝束冬十月辛未陝西宣撫使圖克坦鎰分遣巴噶哈攻下蘇嶺關是月定南征將士功賞格十一月癸酉詔新定學令內削去薛居正五代史止用歐陽修所撰者雅爾拔鶻嶺關巴噶哈取小湖關進攻營口鎮遂取其城丙子宋韓侂胄遣左司郎中王柟以書來乞和請稱伯復增歲幣犒軍錢誅蘇師旦函首以獻壬辰宋參知政事錢象祖以誅韓侂胄移書

行省戊戌詔完顏匡檄宋函侂冑首以贖淮南故地十
二月庚申以孫即康為左丞通吉思忠為右丞孫鐸為
參知政事

八年春正月癸酉以完顏薩喇為參知政事乙亥宋安
丙遣兵襲鷓嶺關巴噶罕完顏果囉擊走之二月丁巳
宋錢象祖遣王柟來以書上行省復請川陝關隘庚申
詔諭有司方農作時雖在禁地亦令耕種三月庚寅以
與宋和諭尚書省夏四月戊申禘于太廟詔諭有司以

苗稼方興宜速遣官分道巡行農事以備蟲蝻宋錢象祖復遣王桷以書上行省閏月辛未諭尚書省曰翰林侍講學士富蔡烏延言使宋官當選人其言甚當其報聘人當先議擇自此更始凡有禮數皆在奉使今既行之遂為永例不可不慎也甲戌制諸州府司縣造作不得役諸色人匠違者準私役之律計傭以受所監臨財物論乙未宋獻韓侂胄等首于元帥府五月丁未御應天門備黃麾立仗親王文武合班起居中路兵馬提控

平南撫軍上將軍赫舍哩貞以宋賊臣韓侂胄蘇師旦

首獻

按韓侂胄倡議用兵意欲恢復而宋寧宗以兵敗乃從金請遂誅其首以獻之是始而用其謀既則

諉其咎誠如

通鑑輯覽

御批

祇奠和議之成不顧事理之非也謹錄識之

并奉元帥府露布以聞懸其首并

畫像于市以露布頒中外丙辰平章政事匡至自軍已

未更元帥府為樞密院癸亥詔移天壽節于十月十五

日六月癸酉宋通謝使試禮部尚書許奕右武衛上將

軍吳衡等奉其主書入見

按宋史載嘉定元年正月以許奕為金國通謝使考是時

佐曾未誅金未許和安得先遣使通謝也金史載三月以與宋和諭尚書省則六月通謝使之來較得事實宋史時日恐

癸未以許宋平詔中外免河南山東陝西等

係誤載

六路今年夏稅河東河北大名等五路半之丁亥以烏庫哩誼為御史大夫丁酉以副都檢點完顏侃為宋諭成使禮部侍郎喬宇副之秋七月戊申宋使朝辭致答通謝書及誓書于宋主八月己丑以戶部尚書高汝礪等為宋生日使九月甲子遣吏部尚書賈守謙等一十三人與各路按察司官推排民戶物力十一月丁酉詔

諸路按察使並兼轉運使初設三司使掌判鹽鐵度支
勸農事以赫舍哩子仁兼三司使癸卯詔戒諭尚書省
曰國家之治在于紀綱紀綱所先賞罰必信今迺自上
省部之重下逮司縣之間律度弗循私懷自便遷延曠
歲苟且成風習此為恒從何致理朝廷者百官之本京
師者諸夏之儀其最自今各懲已往遵繩奉法竭力赴
功無枉撓以循情無依違而避勢一歸于正用範乃民
是日御臨武殿試護衛丁未敕諭臨潢泰州路兵馬都

總管承裔等修邊備乙卯帝不豫丙辰崩于福安殿年四十一諡曰憲天光運仁文義武神聖英孝皇帝廟號章宗陵曰道陵

章宗明昌六年承安五年泰和八年凡十九年

衛紹王諱永濟小字興勝初名允濟以避顯宗諱改允為永世宗第七子母曰元妃李氏始封薛王進封滕王歷刑部尚書殿前都點檢章宗時進封潞王判安武軍節度使尋封韓王又進衛王泰和五年判平陽府已而

改武定軍節度使八年十一月自武定軍入朝是時章宗已感疾衛王辭行章宗留之初章宗雅愛諸王置王傅府尉官以傅導德義及永中永蹈誅由是疏忌宗室遂以王傅府尉檢制王家苛問嚴密門戶出入皆有籍而衛王乃永蹈母弟柔弱鮮智能故章宗愛之章宗既無繼嗣而諸叔兄弟在者又不欲立之惟欲立衛王故于辭行留之無何章宗崩平章政事完顏匡等傳遺詔立衛王衛王承詔舉哀即皇帝位于柩前

大安元年春正月壬戌改元大赦立元妃圖克坦氏為
皇后二月以章宗內人范氏損其遺腹詔中外范氏削
髮為尼封皇子六人為王三月甲辰葬章宗皇帝于道
陵大赦夏四月庚辰殺章宗元妃李氏及承御賈氏以
平章政事完顏匡為尚書令秋九月如大房山謁奠睿
陵裕陵道陵百官表請建儲不允冬十月己卯詔戒勵
風俗十二月詔平陽地震人戶三人死者免租稅一年
二人及傷者免一年貧民死者給葬錢五千傷者三千

以右丞相布薩端為左丞相進封兄越王永功為譙王
二年春二月以禮部侍郎耿端義為叅知政事夏六月
大旱下詔罪己賑貧民闕食者曲赦西京太原兩路雜
犯死罪減一等徒以下免乙丑立子胙王從恪為皇太
子夏人侵葭州乙未詔求直言招勇敢撫流亡庚子遣
使慰撫宣德行省軍士丙午京師戒嚴

按金自章宗與
宋再和後兵威

漸弱蒙古之勢已強至此忽云京師戒嚴疑係元兵
入逼力不能支史家諱而不載今仍原文而附識之帝

日出巡撫百官請視朝不允辛亥宣德行省罷癸丑詔

撫諭中都西京清滄被兵民戶冬十二月辛酉朔日有食之是歲大饑禁百姓不得傳說邊事

三年春三月括民間馬令職官出馬有差夏四月元兵來侵遣鈕祜祿哈達乞和不許初納哈塔邁珠守北鄙以蒙古將侵邊來告帝以擅生邊隙因之及侵擾雲中

諸處連歲不休遂破大水滌以進帝始懼

按金史載元兵初侵即遣

使乞和于事理未晰致緒通鑑綱目所載則金因兵威屢挫及是而後乞和茲據補輯

以通吉遷

嘉努和碩行省事備邊赫舍哩呼沙呼行樞密院事鄂

屯忠孝為尚書右丞梁瑄為叅知政事六月壬寅更定
軍前賞罰格秋八月遷嘉努和碩自撫州退軍駐于宣
平河南大名路軍逃歸下詔招撫之九月遷嘉努和碩
敗績于會河堡居庸關失守禁男子不得輒出中都城
門元軍至中都命梁瑄鎮撫京城冬十月圖克坦鑑遣
烏克遜鄂屯將兵二萬衛中都珠格高琪屯都城外帝
巡撫諸軍元兵退十一月殺河南陳言人郝贊以圖克
坦鑑為右丞相簽中都在城軍赫舍哩呼沙呼棄西京

走還京師即以爲右副元帥益都楊安兒反是時德興
府弘州昌平懷來縉山豐潤密雲集寧東過平灤南至
清滄由臨潢過遼河西南至忻代皆歸于元右副元帥
呼沙呼請兵二萬屯宣德詔與三千人屯媯州遷嘉努
和碩坐覆全軍遷嘉努除名和碩責授咸平路兵馬總
管萬戶奎騰屯古北口十二月簽陝西兩路漢軍五千
人赴中都太保張行簡左丞相布薩端宿禁中議軍事
崇慶元年春正月朔改元呼沙呼請退軍屯南口詔數

其罪免之三月夏人犯葭州延安路兵馬總管完顏諾

爾布禦之夏五月簽陝西勇敢軍二萬人射糧軍一萬

人赴中都括陝西馬泰安劉二祖反掠淄沂州

按大安三年益

州楊安兒反崇慶元年泰安劉二祖反金史俱失載考是時元兵入侵而又盜賊蜂起契丹嘯聚金所以不得併力禦元也茲據續通鑑綱目補輯 賈鉉起復參知政事福興為尚書左

丞詔賣空名敕牒以布薩端為河南陝西安撫使提控

軍馬秋八月萬秋節以兵事不設宴冬十月曲赦西京

遼東北京十一月賑河東南路南京路陝西東路山東

西路衛州旱災

至寧元年春正月故遼人耶律瑠格反犯遼東州郡自

立為遼王

按律耶瑠格于至寧元年正月反自立為遼王金史史載似于二月詔撫諭遼東及宣宗

貞祐三年十月報敗瑠格之捷俱無原委故據續通鑑綱目補解 二月詔撫諭遼東烏

庫哩誼謀不軌伏誅夏五月改元詔諭咸平路契丹部

人之嘯聚者起呼沙呼復為右副元帥領武衛軍三千

人屯通玄門外六月夏人犯保安州殺刺史犯慶陽府

殺同知府事以胥鼎王維為叅知政事秋八月尚書左

左丞完顏元努將兵備邊詔軍官軍士賜賚有差治中
福海別將兵屯城北辛卯呼沙呼矯詔以誅反者招福
海執而殺之奪其兵壬辰自通玄門入殺知大興府圖
克坦南平刑部侍郎圖克坦默呼福海男符寶珊延都
統實古納率衆拒戰死之呼沙呼以兵入宮自稱藍國
都元帥癸巳逼帝出宮以素車載至故邸以武衛軍二
百人錮守之圖克坦鎰聞難作還第已而勸呼沙呼立

昇王

按圖克坦鎰聞難作還第已而勸立昇王金史失
載考呼沙呼以聞鎰言乃殺衛紹王于故邸迎立

昇王茲據續通鑑綱目補書至于圖克坦鑑
身為宰執顧以委蛇自免恭請通鑑輯覽

御批謂其不能計賊又不能盡節徒以定計策立不得謂為
忠臣真

大公至正之言春秋褒貶
之義也謹錄識之

呼沙呼使宦者李思中弑帝于邸

降封東海郡侯宣宗貞祐四年追復衛王諡曰紹

衛紹王大安三年崇慶一年至寧一年凡五年

欽定續通志卷五十三

欽定四庫全書

欽定續通志卷五十四

金紀八

宣宗一

宣宗皇帝諱珣本名烏達布顯宗長子也母曰昭華劉氏初生時世宗養於宮中賜今名章宗時改賜名從嘉始封邢王進封昇王至寧元年八月衛紹王被弒呼沙呼使其黨圖克坦銘等迎帝於彰德府既至京親王百

官上表勸進甲辰即皇帝位以赫舍哩呼沙呼為太師
尚書令兼都元帥封澤王九月乙巳朔諭尚書省事有
規畫者皆即規畫悉依世宗所行丁未諭宰臣曰朕即
大位羣臣凡有所見各宜直言臨奠于衛紹王第有司
奏舊禮當設坐哭帝命撤坐伏哭盡哀敕有司以禮改
葬戊申御仁政殿視朝賜呼沙呼坐呼沙呼不辭辛亥
封皇子守禮為遜王守純為濮王元遣伊呀濟來壬子
改元貞祐大赦尚書右丞相圖克坦鎰進左丞相封廣

平郡王庚申呼沙呼議廢故衛王為庶人詔百官議於
朝堂壬戌授呼沙呼中都路和囉噶圖世襲明安閏月
授圖克坦鎰中都路達魯明安庚午帝復舊名珣辛未
詔追尊皇妣為皇太后是日皇妃皇子至自彰德府遣
使如宋甲申立子守忠為皇太子丙戌降封故衛王為
東海郡侯冬十月丁酉朔京師戒嚴辛丑元伊呼濟米
辛亥元帥右監軍珠格高琪與元兵戰于城北再戰再
敗以兵入城殺呼沙呼于其第持其首詣闕待罪赦之

仍授左副元帥壬子殿前都檢點赫舍哩特默等補外
張行信上疏極論呼沙呼罪惡及珊延實古納之免元
兵陷涿州設京城鎮撫彈壓官置招賢所癸亥放宮女
百三十人十一月戊辰夏人攻會州圖克坦爾擊走
之庚午將乞和于元詔百官議于尚書省以橫海軍節
度使承暉為尚書右丞耿端義為參知政事癸未詔贈
死事費摩福興及珊延實古納官削呼沙呼官爵按張行信
上疏極論呼沙呼罪惡宣宗乃下詔削其官爵金史于
壬子日僅載張行信上封事不明指其論呼沙呼於癸

未日僅載詔贈死事諸人官不及刺呼沙
呼官爵殊失事實茲並從弘簡錄補輯元兵徇觀州

刺史高守約死之又徇河間府滄州十二月丁酉朔帝
御應天門詔諭軍士仍出銀以賜之圖克坦公弼進尚
書右丞相承暉進都元帥兼平章政事左副元帥珠格
高琪進平章政事兼前職

二年春正月辛未元兵徇彰德府知府事洪果玖珠死
之宋人攻秦州統軍使舒穆魯仲溫擊却之癸未有司
奏請權止今年禘享朝獻原廟及皇太后冊禮乙酉徵

處士王澮不至元兵徇益都府又徇懷州沁南軍節度使宋宸死之二月壬子元伊呀濟扎巴來壬戌伊呀濟

來三月

按續通鑑綱目載金人屢遣使來督歲幣起居舍人真德秀上疏請絕之反覆數千言遂罷金

國歲幣大金國志亦載遣人至宋索二年歲幣宋不予使又再至宋迄不予攷宋嘉定七年三月即金貞祐二

年三月金史失載今為附識

辛未遣承暉詣元軍議和丁丑大赦癸

未京師大括粟甲申元伊呀濟扎巴來詔百官議於尚

書省戊子以濮王守純為殿前都檢點兼侍衛親軍都

指揮使權都元帥府事庚寅以衛紹王公主歸于元辛

卯詔許諸人納粟買官京師解嚴

按金史載庚寅納衛紹王公主辛卯京師

戒嚴是時金既納主元當不復侵逼矣攷續通鑑綱目於納公主下載蒙古主引歸出居庸關則此處所載年

卯京師戒嚴當是解嚴之訛今改正

壬辰元兵下嵐州鎮西軍節度使烏

庫哩仲溫死之夏四月乙未朔以知大興府事胥鼎為

尚書右丞時山東河北諸郡失守惟真定清沃大名東

平徐邳海數城僅存河東州縣亦多殘燬命布薩安貞

等為諸路宣撫使

據續通鑑綱目作山東安撫使

以元允和議大赦甲

辰詔有司具陣亡人子孫以備錄用丁未以承暉為平

章政事乙卯尚書省奏巡幸南京詔從之己未莽衛紹
王五月乙亥輟朝帝決意南遷詔告國內太學生趙昉
等上章極論和議之害以大計已定慰遣之帝詣原廟
奉辭以南京留守布薩端等嘗請臨幸先詔諭之壬午
車駕發中都以皇太子留守癸巳次中山府教扈從所
踐禾稼計直酬之六月甲午朔以高汝礪為參知政事
癸丑次內邱縣元伊時濟米戊午次彰德府曲赦其境
內庚申次鉅橋鎮是日南京行宮寶鎮閣災秋七月至

南京

按大金國志載貞祐二年大名守余崇義奏乞遷都詔集議於明陽殿時廷臣或主遷或主守而主

遷者又各議其利害經日莫定下詔決遷汴京八月二十
十八日駕興十月二十四日至汴與金史所載迥異

詔立元妃溫都氏為皇后八月庚子皇太子至自中都

按續通鑑綱目載宣宗徙汴次良鄉扈虜軍叛降元元
合其兵圍燕京宣宗聞之乃召皇太子至汴金史但云
八月皇太子至自中都諱
之也今仍原文而附識之丁未夏人入邊九月壬戌朔

日有食之癸亥山東路奏萊州之捷庚辰詔訓練軍士

冬十月甲午詔遣官市木波西羌馬陝西軍戶戰死者

給糧贍其家丁酉元兵徇順州勸農使王晦死之壬寅

穆延盡忠進平章政事以富珠哩德裕為參知政事兼
簽樞密院事曲赦中都路乙卯遣富珠哩德裕行尚書省
于大名府丙辰元兵攻威州德州防禦使完顏訥努以
罪伏誅十一月丁卯以布薩端為尚書左丞相曲赦山
東路辛未賜衛紹王家屬廩餼丙子蘭州譯人程陳僧
叛西結夏人為援癸未曲赦遼東路十二月戊戌遣真
定行元帥府事永錫等援中都丁未以和議既定聽民
南渡乙卯登州刺史耿格伏誅流其妻孥元兵徇懿州

節度使高閻山死之

三年春正月壬戌遣內侍諭永錫防邊毋以和議為辭
乙丑詔宣撫阿哈總管和卓討賊劉二祖張汝楫乙亥
夏人犯環州北京軍亂殺宣撫使鄂屯襄丁丑右副元
帥富察齊錦叛以其軍降元乙酉皇太子亮二月辛卯
環州刺史烏庫哩延壽及錫默摩囉歡等與夏人戰于
州境敗之元伊呼濟來丁酉詔諸色人遷官並視女真
人丙午尚書省奏請置選併於南京以便赴調者從之武

清縣巡檢梁佐柳口巡檢李耀珠以誅亂賊張暉劉永
昌等功進官有差皆賜姓完顏丁未山東宣撫使布薩
安貞遣提控布薩瑠嘉等討賊楊安兒安兒敗死

據續通鑑

綱目
增輯

殲其衆降偽頭目三百餘人脅從民三萬餘戶三

月壬戌詔河北州縣官令文武五品以上辟舉不聽以
他事差占仍勒終任有勞績者但升遙領之職應降
罰者亦止本處居住癸亥詔百官各陳防邊利害丙寅
敕河東河北大名長貳官訓練隨處義兵鄰境有警責

其裒援降人自拔歸國者遷職仍列其姓名以招諭來者沿河州縣官罷軟不勝職任者汰去令五品以上官公舉仍許於今季到部人先擇能者量緩急易之丁卯安武軍節度使張行信上書言急務四事庚午諭遼東宣撫使布希萬努選精銳屯潘州廣寧以候進止戊寅諭尚書省以歲旱議弛諸處碾磴以其水溉民田勸農事李華言河北州縣官吏多求河南差占以避難宜發元任領戍兵者不可離則別注以往壬午山東宣撫司

破紅襖賊于大沫壩瓜爾佳錫里格及默呼擒賊渠劉
二祖等斬之前後殪賊萬計前年京兆治中李友直私
走華州結同知防禦使馮朝等圍集州民號忠義扈駕
都統府相挺為亂殺其防禦判官完顏巴錦及城中女
真人以書約都統楊珪為府兵所得珪諱之請自効誘
友直等執之麾下招千餘人納仗阮諸城下時京師道
路隔絕安撫司以便宜族友直等至是以狀聞乃贈巴
錦及被害官軍十餘人各一官珪伏誅夏四月丙申河

南路蝗遣官分捕帝諭宰臣曰朕在潛邸聞捕蝗者止及道傍使者不見處即不加意當以此戒之又言舊制夏至後免朝四日一奏事此在平時可也方今多故朕豈憚勞但使國事無廢則善矣癸卯籍赴選監當官為軍乙巳曲赦富察齊錦脅從之黨募能殺獲齊錦者以其官官之丙午以調度不給罷隨朝六品以下官及承應人輸傭錢經兵州府其吏減半司縣吏減三之一其餘除開封府南京轉運司外例減三之一有祿官吏被

差不出本境者並罷給券出境者以其半給之修內司
軍夫亦減其半壬子詔遣使同山西宣撫司選其民勇
健者為軍諭有司勿拒河北避兵之民所至卹之招大
沫堦渠賊孫邦佐張汝楫以五品職下詔湔洗其罪丙
辰諭田琢留山西流民少壯者充軍老幼者令就食於
邢洺等州帝議遣親軍援中都宰臣以為行宮單弱不
可遣遂止五月庚申中都陷尚書右丞相兼都元帥定
國公承暉戶部尚書任天寵知大興府事高霖死之辛

未立皇孫鏗為皇太孫辛巳帝諭宰臣多事之秋陳言
者悉送省恐卿等不暇朕於宮中置局命正官數員擇
可取者付出施行戊子議伐西夏遣大臣鎮撫京兆秋
七月戊午朔元兵陷濟源縣己未徵弓箭于內外品官
以級遞減之庚申置陳潁漕運提舉官以戶部勾當官
往來督察帝聞河北譏察官有要求民財始聽民渡河
者避兵民至或餓死自溺特命御史臺體訪之又禁隨
朝職官歛民碾磴以自營利詔河間孤城移其軍民就

粟清州括民間贏付諸軍與馬參用癸亥詔河北郡縣
軍須並減河南之半丙寅遣參知政事高汝礪往河南
便宜措置糧儲甲戌借平陽民租一年丁丑肅宗神主
至自中都奉安于明俊殿己卯明德皇后神主至自中
都八月戊子朔以陝西統軍使完顏哈達簽樞密院事
己丑制軍府庶事樞密院官須與經歷官裁決癸巳詔
遣官體究京西路新遷軍戶己亥詔武舉官非見任及
已從軍者隨處調赴京師別為一軍以備用被薦未授

官者量才任之前冀州教授鈕祜祿特烈集義兵禦土
寇復攝州招徠民戶至五萬遷三官以太常卿侯摯為
參知政事行中書省于河北東西兩路太祖御容至自
西京奉安于啓慶宮甲辰置行樞密院于徐州歸德府
丙午山東西路宣撫司完顏弼表張汝楫將謀復叛密
遣人招孫邦佐邦佐斬其人馳報弼弼殺汝楫及其黨
承制陞邦佐德州防禦使餘立功者賞有差帝嘉弼功
詔獎諭之丁未詔近臣舉良將加孫邦佐昭毅大將軍

泰定軍節度使仍官其子戊申東平益都太原潞州置
元帥府乙酉監察御史許古獻恢復中都之策紅襖賊
掠城武宣撫副使延札天澤擊敗之進天澤一官符校
有功者命就遷賞命侯摯招邢州賊程邦傑以官不從
則誘其黨圖之壬子置行省于陝西乙卯增沿河關羅
之法十取其八以抑販粟之弊詔增步軍以戍京東西
選陝西騎兵增京畿之衛諭陝西堅守延安臨洮環慶
蘭會保安綏德平涼德順鎮戎涇原廊坊邠寧乾耀等

處要害分渭南州郡步兵屯平原令宣撫使治邠州副使治同州之澄城以統之更以步騎守沿渭諸津丙辰

永錫坐援中都失律

按中都之破由內則穆延盡忠有異志外則援兵敗于霸州考永暉

遣人以琴駕奏告急宣宗乃命左監軍永錫左監都烏庫哩慶壽御史中丞李英等率兵援救英遇元兵于霸州敗死慶壽永錫軍聞之皆潰歸自是中都援絕金紀木載穆延盡忠之出走亦未載霸州之敗至于慶壽永錫同潰而止載永錫坐援中都失律於事實俱未詳悉茲據續通鑑綱目附識削其官杖之九

月丁巳朔定職官避難不仕違限者奪三官永不升注

辛酉以永錫為信武將軍息州刺史甲子諭宰臣沿淮

塘路以南地向係民業今為豪勢據奪者其令有司察之內寅樞密院言陝西河東世襲蕃部巡檢與明安穆昆例罷其俸今邊事方急宜仍急之庶獲其用又西邊弓箭手有才武出眾獲功未推賞者令宣撫司覈實以聞從之丁卯詔授隱士王澹太中大夫右諫議大夫充遼東宣撫司參謀官戊辰圖克坦烏登告平章政事穆延盡忠逆謀詔有司鞠之設潼關提控總領軍馬等官辛未置河北東路行總管府於原武陽武封邱陳留延

津通許杞諸縣以治所徙軍戶黜衛紹王母李氏光獻皇
后尊謚神主在太廟畫像在衍慶宮並遷出之陳州鎮
防軍段仲連進羊三百詔遷三官命右丞高汝礪詣陳
州規畫糧儲癸酉朝謁世祖太祖御容于啓慶宮行獻
享禮始用樂甲戌朝謁太宗熙宗睿宗御容行獻享禮
詔開滑瀋濟曹滕諸州置連珠寨如衛州詔經兵處河
北山東等路及平涼慶陽臨洮府涇汾秦鞏德順諸州
職事官並以二十月為滿詔有能率衆復取中都者封

王逸一品階授二品職能戰却敵善誘降人取附都州
縣者予本處長官散官隨職遷授餘州縣遞減二等紅
襖賊周元兒陷深祁州束鹿安平無極等縣真定帥府
以計破之斬元兒及殺其黨五百餘人丁丑定司縣官
募民進糧賞格庚辰陝西宣撫司奏萬戶楊再興擊走
夏人之捷壬午以空名宣敕付陝西宣撫司凡夏人入
寇有能臨陣立功者五品以下聽遷授乙酉置大名府
行總管府于柘城縣以治所徙軍戶冬十月丙戌朔烏

庫哩德升出為集義軍節度使兼亳州管內觀察使丁亥尚書右丞汝礪言北軍戶之徙河南者宜賜以係官間田及牧馬草地之可耕者而罷其月糧從之夏人入保安都統完顏果嘉努破之攻延安戍將又敗之至是捷至戊子以圖克坦思忠為參知政事庚寅誅穆延盡忠癸巳詔樞密副使布薩安貞行樞密院于徐州戊戌遼東宣撫司奏敗瑠格之捷甲辰詔求廣平郡王承暉之後得其猶子永懷以為器物直長丙午夏人陷臨洮

陝西宣撫副使完顏和索哩被執庚戌詔布薩端兼都
元帥行尚書省于陝西壬子以同華舊屯陝西兵及河
南所移步騎舊隸陝州宣撫司者改隸陝西行省名中
奉大夫襲封衍聖公孔元措為太常博士遼東賊布希
萬努僭號改元天泰十一月丙辰朔河北行尚書省侯
摯入見詔河北西路宣撫副使田珣自瀋徙其兵屯陝
樞密院進王世安取盱眙楚州之策遂以世安為淮南
招撫使與泗州元帥府所遣人同往計度其事戊辰夏

人犯綏德克戎寨官軍擊敗之犯綏平又敗之參知政事圖克坦思忠言今陳言者多掇拾細故乞不送省止令近侍局度其可否發遣帝曰若爾是塞言路凡係國家者宜得不由尚書省乎庚午帝與高汝礪商畧遣官括田賜軍之利害汝礪言不便者數端乃詔有司罷其令仍給軍糧之半其半給折實之價甲戌伊喇托卜嘉與夏人戰于熟羊寨敗之內子知臨洮府圖們呼圖克們擊破夏兵於城下庚辰詔官荒牧馬地軍戶願耕者聽已

為民承種者勿斂元兵徇彰德府知府圖佃色埒默死
之十二月乙酉朔徙朔州民分屯嵐石隰吉絳解等州
己丑侯摯復行尚書省于河北戊戌陝西行元帥府乞
益兵以田琢之衆隸之仍獎諭以詔壬寅詔林州刺史
惟宏與都提控蘓爾坦同經理邊事乙巳元兵徇大名
府癸丑太孫薨

四年春正月丙寅紅袍賊犯泰安德博等州山東西路
行元帥府敗之丁卯諭御史臺曰今旦視朝百官既拜

之後始聞開封府報衙聲四方多故之秋弛慢如此可
乎己巳尚書右丞高汝礪進左丞庚午元兵徇曹州辛
未侯摯進尚書右丞乙亥以遂王守禮為樞密使濮王
守純為平章政事己卯立遂王守禮為皇太子壬午言
者請遣官勸農宰臣言民恃農以生初不待勸但寬其
力勿奪其時而已遣官以往吏卒因為姦利是乃妨農
何名為勸帝然之二月甲申朔日有食之詔皇太子控
制樞密院事以金鑄撫軍之寶授之元兵圍太原召樞

密官問所以備禦之策以永錫發樞密院事權尚書右丞丁亥以胥鼎為樞密副使權尚書左丞行省于平陽

據續通鑑綱目作四月後事

元兵攻下霍山諸隘甲辰命李革為修

奉太廟使權祔肅宗神主于世祖室詔凡死節之臣立

廟致祭同知觀州軍州事張開復河間府滄獻等州并

屬縣十有三三月經畧副使張文復恩邢二州已卯處

士王澹以右諫議大夫復選中奉大夫翰林學士仍賜

詔褒諭夏四月己丑陝西行省奏秦州官軍破妖賊趙

用劉高二之捷張開奏復清州等十有一城甲午改賜
皇太子名守緒丙申河北行省侯摯言比商販粟渡河
官遮糴其什八商遂不行民飢益甚請罷其令從之辛
丑紅襖賊渠郝定僭號署官陷滕充單諸州萊蕪等十
餘縣道路不通詔樞密院招捕禦備蔡息行元帥府兵
拔木陟關五月癸丑朔禮官言太廟既成禮可從簡約
惟以親行祔享為敬從之山東行省上沂州捷辛酉以
侯摯行省事于東平己巳夏人將圖臨洮鞏州關長安

命陝西行省嚴為之備夏人修米羌城界河橋元帥右
都監完顏薩布遣兵焚之六月壬辰遼西偽瀛王張致
上表來歸詔授特進行北京路元帥府事兼本路宣撫
使罷河北諸路宣撫司更置經畧司壬子以旱詔參知
政事李革審決京師冤獄秋七月癸丑必喇阿魯公復
威州及獲鹿縣甲寅山東行省檻省郝定等至京師伏
誅閏月壬午朔日有食之辛卯復深州甲午命掌軍官舉
奇才絕力之人提控都副統等官互舉其屬庚子詔河南

陝西鎮防軍應廕及納粟補官者當役如舊候事定乃
聽赴銓八月甲寅夏人入安塞堡元帥左監軍烏庫哩
慶壽遣軍敗之乙亥命大名招撫使募人持詔往諭中
都丙子元兵攻延安己卯夏人入結耶背川官軍擊走
之九月辛巳朔元兵攻防州以永錫為御史大夫領兵
赴陝西便宜從事壬辰元兵攻代州經畧使鄂屯酬和
尚死之

按金史忠義傳載鄂屯酬和尚被執不屈死之
金紀止云戰沒則失其被執不屈之節矣今改

輯冬十月己未親王百官奉迎祖宗神主於太廟招射

生獵戶練習武藝知山徑者分屯陝號要地命必喇阿

嚙岱守潼關完顏仲元軍盧氏元兵攻潼關

按續通鑑綱目載元

兵攻潼關時臺臣言京師重兵徒以城守為事中都之危又將見於今日宜遣陝西兵拒潼關與伊爾必斯為持用之勢云云珠格高琪以元兵日逼欲以重兵駐汴自固州郡殘破所不復恤乃謂備禦方畧非臺臣所知不用其議自此國勢益衰矣西安軍節度使尼瑪哈富勒呼戰沒辛

酉帝親行祔享禮乙丑詔諭河南官吏軍民以賞格募立功之士命參知政事圖克坦思忠提控京師鎮撫伊喇卓拉布屯關陝丙寅詔徙衛紹王及錫厲王家屬于

京師詔吏禮兵工四部尚書董治防城器械鑿坎穿築垣牆元兵徇汝州沿河惟存通報小舟餘皆焚之庚午詔宿糧州縣簽民為兵就署隊長以自防過河南行省胥鼎遣必喇阿嚕岱以軍一萬圖克坦拜札以軍五千由便道濟河趣關陝自將平陽精兵援京師命樞府督軍應之辛未置官領招賢所事命內外官採訪有才識勇略能區畫防城者以聞不為人所知者聽赴招賢所自陳壬申以費摩揚格知歸德府事行樞密院事甲戌

諭附京民盡徙其芻糧入城丙子完顏哈達以徵兵失
應坐誅戶部郎中魏琦以沒王事官其子從韓希祖言
以戰功致身者盡拘京師備用十一月庚辰朔增定守
禦官及軍人遷賞格壬午河東行省胥鼎入援京師以
知平陽府王質權元帥左監軍同知完顏僧嘉努權右
監軍代鎮河東拜鼎為尚書左丞兼樞密副使遣還平
陽据續通鑑綱目增輯乙酉實嘉喀齊喀楊噶拉等大敗夏人于
定西元兵至沔池右副元帥富察伊爾必斯軍潰而逃

丙戌權元帥右監軍完顏哈達以軍歸國升鎮南軍節
度使癸巳帝諭皇太子京城提控官有以文資充者彼
豈知兵其速易之戊戌敕諸州縣簽籍軍民以備土寇
華州元帥府復潼關庚子元兵退

從弘簡
錄補輯

罷在京防城

民軍河南路統軍使赫舍哩嘉赫以發兵後期坐誅丙
午內族承立進所獲馬駝帝曰此軍士所得即以予之
可也十二月辛亥珠格高琪加崇進尚書右丞相癸亥
元兵攻平陽晉鼎遣兵拒戰敗之

據續通鑑
綱目補輯

丙寅元兵

隋大名府壬申進自代州神仙橫城及平定承天鎮諸
隘攻太原府宣撫使烏庫哩禮遣人間道告急詔發潞
州元帥府平陽河中絳孟宣撫司兵援之乙亥高琪請
修南京裏城帝曰民力已困此役一興病滋甚矣城雖
完固朕亦何能獨安此乎

興定元年春正月癸未宋賀正旦使朝辭帝謂宰臣曰
聞息州南境有盜此乃彼界飢民沿淮為亂爾宋人何
故攻我高琪請伐之以廣疆土帝曰但能守祖宗所付

足矣安事外討皇子平章政事濮王守純授世襲東平
府路三屯明安尚書左丞晉鼎進平章政事封莘國公
乙巳元兵攻觀州二月戊申朔初用貞祐通寶凡一貫
當貞祐寶券千貫己酉命樞密院汰罷軟軍士諭尚書
省用官馬給驛傳以紓民力辛亥以完顏薩布簽樞密
院事癸丑罷招賢所己未元兵徇忻代詔定州縣官雖
積階至三品坐乏軍儲者聽行部決遣壬戌尚書省請
罷州府學生廩給不許三月戊寅敕事關刑名當面議

之勿聽轉奏以李革知平陽府兼河東南路兵馬都總
管權參知政事行尚書省壬午定民間收潰軍亡馬及
以馬送官之格乙酉帝宮中見蝗遣官分道禱捕仍戒
勿以苛暴擾民乙未先徵山東兵接應苗道潤共復中
都而石海據真定叛慮為所梗乃集鈕祜祿貞郭文振
武仙所部精銳與東平軍為犄角之勢圖之己亥元兵
攻新城庚子攻霸州甲辰威州刺史武仙討石海斬之
及其黨二百餘人降葛仲趙林張立等軍進仙權知真

定府事夏四月丁未朔以宋歲幣不至

按宋與金修好已非一日忽爾

御批

渝盟罷幣失計之甚恭讀通鑑輯覽謂其失已之信幸人之災號亡虞及理勢必然足見宋

睦之君臣真不明於鄰禦敵之道矣

命烏庫哩慶壽完顏薩布等經略南

邊庚戌花帽軍作亂于滕州詔山東行省討之節度副使伊喇揚格討南陽五朵山盜平之癸丑以安化軍節度使完顏寓權元帥左都監行元帥府事督經略使苗道潤進復都城且令和輯河間招撫使伊喇特爾格等軍戊午平定州賊閻得用之黨閻顯殺得用以其衆降

已未以權參知政事遼東路行省完顏伊爾必斯為參知政事行尚書省元帥府于博索路以權遼東路宣撫使富察烏錦權參知政事行尚書省元帥府于上京甲子元帥完顏薩布破宋兵于信陽乙丑濟南泰安滕兗等州賊並起侯執遣棣州防禦使完顏霆討平之降其壯士二萬人老幼五萬人薩布復奏敗宋軍于隴山等處俘馘甚衆辛未權孟州經略使蘓爾坦追賊宋子玉至輝州其黨邢福殺子玉以衆來歸壬申詔諭遼東諸

將討布希萬努并捕受偽官家屬得高禮妻子皆戮之
完顏薩布軍渡淮破光州兩關五月戊寅陝西行省破
夏人于大北岔癸巳宋人攻潁州焚掠而去戊戌行樞
密院兵敗宋人於泥河灣又敗之樊城縣宋人取連水
縣甲辰元兵下沔城縣軍官任福死之六月己酉苗道
潤表歸國人李琛復以衆叛琛亦表道潤異謀詔山東
行省察之修潼關遣中使持詔及暑樂勞夫匠設潼關
使副及二門集津提舉官權參知政事張行信進參知

政事甲寅招撫使惟宏言彰德府守臣擅徙民山砦避
兵帝曰難保之城守之何益徒傷吾民爾勿治丙辰詔
樞密院遣經歷官分諭行院嚴兵利器以守衝要宋人
合土寇攻東海境戊午以宋數犯境及歲幣不至詔諭
沿邊罪宋置南京流泉務遼東行省遣使奏止月中敗
契丹之捷秋七月丙子朔日有食之辛巳宋人圍泗州
壬午圍靈璧縣癸未隰州振威軍萬戶馬寬逐其刺史
李策據城叛州吏擒戮之夷其族乙酉宋人襲破東海

縣丙申置提舉倉場使副甲辰夏人犯黃鶴至官軍敗
之乙巳宋人及土寇攻海州經略使擊破其衆夏人圍
羊狼寨帥府發諸鎮兵擊走之八月己酉官軍及宋人
戰于石湫南及漣水縣中土橋敗之壬子削御史大夫
永錫官爵有司論失律當死帝以近族特貫之癸丑宋
人攻確山縣官軍擊敗之以宋人渝盟詔諭中外仍命
大臣議其事乙卯集賢院諮議官朱蓋上書陳禦敵三
策壬戌海州經略使阿布哈努色爾敗宋人于其境提

控李元與宋人戰屢捷多所俘獲徙欄通渡經畧司於黃陵峒丙寅左司諫布薩毅夫乞更開封府號賜美名帝曰山陵在中都朕豈樂久居此乎遂止甲戌元帥右都監承裔遣其將納喇吉遜等合巴鄂特族都管尼瑪哈以兵襲擊果爾餘族諸蕃帳大破之九月丁丑以元帥左監軍必喇阿魯岱權參知政事行省于益都戊寅夏人犯綏德克戎寨都統離世暉逆擊却之己卯宋人窺息州蔡州帥府以輕兵誘其進別以銳師邀擊之虜

其將沈俊壬午改元大赦辛卯元兵徇隰州及汾西縣
癸巳攻沁州遼東行省完顏伊爾必斯為叛人伯特呼
圖所殺乙未元兵攻太原簸箕掌寨丁酉薄太原城攻
交城清源冬十月丁未霖雨詔寬農民輸稅之限庚戌
以將有事于宋詔帥臣整厲師徒甲寅息州帥府獻破
宋人于中渡之捷乙卯元兵徇中山府及新樂縣辛酉
制定州府司縣官失覺姦細罪乙丑元兵下磁州又下
鄒平長山及淄州壬午徙五朶山賊魚張二等衆於歸

德睢陳鈞許諸府州元兵下濱棣博淄沂五州甲午河西
嘉納克楚納克等族千餘戶未歸丁酉詔唐鄧蔡州行
元帥府舉兵伐宋戊戌元兵攻太原府庚子帝謂宰臣
曰朕聞百姓流亡逋賦皆配見戶人何以堪又添徵軍
須錢太多亡者詎肯復業其議減除十二月甲辰朔元
兵攻潞州都統馬甫死之庚戌元帥左監軍富察烏錦
進右副元帥權參知政事充遼東行省元兵下益都府
甲寅海州經略使報提控韓璧敗宋人于鹽倉己未元

兵復攻沂州又下密州節度使完顏寓死之壬戌以侯
執兼三司使庚午免逃戶復業者差賦

二年春正月乙亥詔議賑恤免中京嵩汝等州逋租壬
午宋人攻淮北唐州元帥府擊敗之獲統領季雄韜陳
臯以歸癸未近侍局副使額爾克奏南師之捷乙酉元
兵圍夏王城李遵瑱命其子居守而出走西涼詔諭諸
帥府明斥堠嚴守備戊子唐鄧元帥完顏薩布奏連破
宋人之捷宋人攻泗州却之二月癸卯宋人侵清口行

樞密院遣兵敗之諭晉鼎克宋散關可保則保不可保則焚毀而還丙午額爾克奏敗宋人於防山赫舍哩和勒端亦遣使奏光州信陽之捷庚戌海州經畧敗宋兵于朐山辛亥張行信出為彰化軍節度使兼涇州管內觀察使壬子御史以北兵退請汰各處行樞密院元帥府冗官詔仍舊制完顏薩布奏棗陽之捷

按續通鑑綱目載棗陽之

役金人戰輒敗力不能支遂潰金本紀云完顏薩布奏捷二書互異如此癸丑完顏阿林奏

皂郊堡之捷丁巳壽州行樞密院破宋人高柳橋水砦

夷其砦而還壬戌額爾克遣兵拔宋柵于碁盤嶺又破其裴家莊寒山嶺龍門關等處得粟二千餘石丙寅諭尚書省曰聞中都納粟官多為吏部繳駁殊不知方闕乏時其利害為何如又立功戰陣人必責保官若輩皆義軍白丁豈識職官苟文牒可信即當與之至若在都時規運薪炭入城者朕嘗授以官此豈容偽而間亦為所沮格自今勿復若是赫舍哩約赫德破宋人于盱眙己巳以侯執行省河北兼行三司安撫司事三月庚辰

尚書集文資官雜議進士之選詔依奉和例行之癸未
額爾克敗宋人于光化軍戊子以御史中丞巴古喇為
參知政事陝西行六部尚書楊貞削五官累杖解職額
爾克表言官軍自桐柏入宋境所向多克捷癸巳宋人
爭皂郊堡軍將完顏阿林戰沒辛丑富察烏錦表左監
軍格棚額誣殺防州宣撫副使赫舍哩阿敦帝從尚書
省奏阿敦徐議卹典格棚額亦姑牢籠使之夏四月壬
寅朔又表遼東從宜伊爾必斯貸糧高麗不應輒以兵

掠其境帝遣人往諭高麗使知興兵非上國意乙巳置
河南捕盜使副以濮王府尉完顏摩囉歡為宣差提控
以巡督之是日曲赦遼東等路以瓜爾佳必喇權參知
政事行省于遼東丁未承裔敗宋人于皂郊堡壬子遣
完顏蘓呼額爾克同赴遼東察訪叛賊萬努事體行省
侯摯督兵復密州提控朱琛復高密縣丁巳陝西行省
兵破宋雞公山取和州陳州至河池縣黑谷關守者皆
遁前後獲糧九萬斛錢數千萬軍實不可勝計戊午紅

襖賊犯徐邳行樞密院兵大破之己未伊爾必斯自柘
城遣子上書待罪赦之丁卯臨洮路奏敗宋人之捷東
平行省敗黑旗賊拔膠西縣渠賊奪全未援併破之戊
辰河北行省敗紅襖賊進至密州降偽將校數十人
卒七百人悉復其業五月辛未朔中都經略副使賈瑤
殺苗道潤道潤將張柔襲之柔遇元兵遂降

按金史載
興定二年

六月樞密院論賈瑤殺苗道潤罪而未載道潤將張柔
襲賈瑤事續通鑑綱目作張柔討之考張柔本非奉命

御批
不可謂討謹遵
通鑑輯覽書法補載

鳳翔元帥完顏閻山攻破宋部落

沿邊塌香爐堡諸屯甲戌招撫副使洪果阿嚕岱襲破
李全于莒州丙子夏人自葭州入鄜延元帥承立遣兵
敗之瑪竒峯萊州民曲貴殺節度經略使內族專努自
稱元帥以城叛附于宋山東招撫司遣提控王庭玉招
撫副使洪果阿嚕岱等討平之內戌鞏州行元帥承裔
遣提控烏庫哩長壽納喇吉遜分道伐宋皆克捷而還
辛卯壽州行樞密院南城軍攻辛城鎮一軍趣史河與
宋人戰敗之壬辰河北行省復黃縣乙未第鳳翔秦鞏

三道南征將士功各遷其官己亥元兵徇錦州元帥劉仲亨死之六月甲辰樞密院言元集兵應州飛狐將分道南下以窺陝西河東各路義士土兵蕃漢弓箭手宜加教閱以備緩急東平單州衝要豫徙其農民糧畜置可守之城修近城水砦因為固潼谷遠連高鞏宜令兩帥府選官按視阨塞又言賈瑀等刺殺苗道潤乞治其專殺之罪餘州郡各以正職授頭目使分治一方帝曰道潤之衆亟收集之瑀等是非未明姑置勿問諸頭

目各制一方利害至重更審處之石州賊馮天羽等據臨泉縣為亂敗官軍扇動旁郡縣州刺史赫舍哩公順以兵討之天羽等數十人迎降公順殺之餘賊走保積翠山遣將王九思攻之不下詔馬季良持詔敕金幣往招之比至九思先破柵殺賊二千人餘復走險已而其黨安國用等詣季良降者五千餘人就署國用同知孟州防禦使事以次遷擢有差分其衆於絳霍間壬子紅襖賊犯沂州官軍敗之追至白里港都提控齊信歿於

陣丙辰遣監察御史鈕祜祿蕪卜實往河中絳解等郡
同守土官商度可保城池丁巳帝以久旱諭宰臣治京
師寃獄壬戌御史言戶部員外郎臧伯昇供億息州偶
遇官軍戰勝亦冒遷官乞論其罪帝曰詰所從來必連
及帥府多故之秋豈為一官遂忘大計但令釐正之秋
七月庚午朔日有食之辛未詔賞南伐將士有差夏人
犯龕谷提控瓜爾佳瑞及其副趙防擊走之己卯遣官
望祀嶽鎮海瀆于北郊享太廟祭太社太稷祭九宮貴

神于東郊以禱雨遣太子太保阿布哈德剛禮部尚書
楊雲翼分道審理冤獄癸未大雨庚寅擇明幹官提控
銓選無違失者與升擢令譯史不任事者驗已歷俸月
放滿別選能者甲午夏人復犯龕谷瓜爾佳瑞大破之
遣官詣諸道選寄居守闕丁憂官及親軍入仕才堪總
兵者付樞密任使八月己酉詔河北行省完顏霆進軍
援山東招撫使田琢自今將士立功聽琢先賞以聞元
穆呼哩等自太和嶺徇河東乙卯陷代州辛酉棗州提控

赫舍哩綽哈討賊張聚大破其衆復濱棣二州姦人李
宜伏誅復禁北歸民渡河戊辰元兵下隰州九月乙亥
下太原府元帥左監軍烏庫哩德升死之丙戌諭皇太
子曰軍務之速動關機會悉從中覆則或稽緩自今有
當亟行者先行後聞以納哈塔富拉塔為元帥右監軍
行元帥事于潞州戊子置秦關等處九守禦使命完顏
芬徹等分戍諸阨議遷海州侯摯言不便乃止元兵徇
汾州節度使烏雅恩徹亨死之庚寅李全破密州執招

撫副使洪果阿嚕岱同知節度使瓜爾佳肆嘉坊卒卯
元兵下孝義縣丙申李全破壽光縣冬十月甲辰李全
破鄒平縣戊申破臨朐縣己酉元兵徇絳潞壬子攻平
陽提控郭用死之癸丑下平陽知府事李革及蕪爾坦
死之權平定州刺史范鐸以棄城伏誅山東路轉運副
使程戩及邵州副提控王汝霖等通宋人為變伏誅宋
人攻漣水縣提控劉瑛敗之丁巳元兵攻澤州戊午尚
書省言獲奸細叛亡率多僧道詔沿邊諸州惟本處受

度聽依舊居止來自河北山東遣入內郡譏其出入已未李全據安邱宣差太府少監伯特玩擅率兵攻全為全所敗提控王顯死焉甲子詔河東北路忻代寧化東勝諸州並受嵐州帥府節制十一月庚午大赦庚辰御登賢門召致政舊臣賜食訪以時政得失辛巳以赫舍哩和勒端權簽樞密院事行院于徐州額爾克行元帥府事于息州甲申詔河東南路隰吉等州聽絳州元帥府節制元兵取潞州元帥右監軍納哈塔富拉塔參議

官王良臣死之戊子龕谷提控瓜爾佳瑞敗夏人于質
孤堡河北行省奏海州之捷丙申元兵下太原之韓村
若十二月辛丑簽樞密院事富察伊瑋圖伏誅甲寅以
開封府治中呂子羽等使于宋至淮宋人不納而還紅
襖賊攻彭城之胡村寨徐州兵討敗之乙卯以禮部侍
郎穆延呼喇勒為汾陽軍節度使權元帥右監軍嵐州
元帥瓜爾佳完復河東癸亥詔伐宋命皇太子撫軍胥
鼎言樞密掌天下兵凡事已屬東宮又設諸道行院樞

密但奉行文書而已自今軍中號令關賞罰者皆明注
詔旨毋容軍司得售其奸欺帝從之以布薩安貞為左
副元帥權參知政事行尚書省元帥府事甲子帝諭有
司京師少食死於祁寒朕甚憫之給以後苑竹木令居
獲燠所

欽定續通志卷五十四